

a powoła sobustawy towařnistwa na powšitkowne zhromadžizny. Za kóždu tychle zhromadžiznow postaja džeňski porjad a ma w nich předsydować. W posedženjach předsydstwa, kaž we zhromadnych posedženjach předsydstwa a wubjerka rozrisuje při runosći hłosow jeho hłos.

*b. Naměstnikowe.*

Wón zastupuje předsydu, hdyž je tutón zadžěwany. W tym padže ma wón přislušnosće, runje pod a) mjenowane.

*c. Pismawjedžerjowe.*

Tutón zastupuje w zjenočenju z předsydu towařnistwo we wšěch sudniskich a nimosudniskich naležnosćach. Wón wjedže protokoll w posedženjach předsydstwa a w zhromadnych posedženjach předsydstwa a wubjerka, kaž tež we hłownej zhromadžiznje, stara so za registrandu a khowanje aktow, a hotuje trěbne wozjewjenja, nawěštki, listy a druhe pisma.

*d. Pokładnikowe.*

W rucy pokładnika leži cyłe pokładnistwo towařnistwa, dokelž ma z jeneje strony wšitke přinoški sobustawow a druhe dokhody přijimać a z druheje strony wšitke wot předsydy abo jeho naměstnika podpísane towařnistwo nastupowace zličbowanki a druhe dokłady plaćić. Wón ma tež kóždolětnje hač do kónca februara wubjerkej lětnu bilanciu wudawkow a dokhodow předpožić.

*e. Knihownikowe.*

Knihownik, kotremuž dohlad nad towařstwowej knihownju přisluša, wobstara wot předsydstwa wobzamknjene nakupjenje knihow, wjedže wo knihach dospołny katalog a wupožčuje knihi na přijimace wobswědčenje.

*f. Knihiskładnikowe.*

Wot knihiskładnika ma so kóždolětnje hač do kónca februara nadrobny inventar spisow wot towařnistwa wudatych zestajeć a wubjerkej předpožić.

§ 12. Wo wubjerku.

Wubjerk twori so ze štyrjoch sobustawow, kotrež hłowna zhromadžizna z wjetšinu hłosow na šěsć lět wuzwola.

Z tych po přiwzaću tutech wustawkow wuzwolonych štyrjoch wubjerkowych sobustawow wulosuje so položca po třoch lětach. Po minjenju tuteho časa nowowuzwolene wosoby wjedu swoje zastojnstwo prawidłownje na šěsć lět.

Kóždy wubjerkownik smě so po minjenju zarjadowanskich lět hnydom zasy wuzwolić.